

Матфеин 18 бөлг.

1. Тер цагла сурһульчнр Иисусур өөрдэд сурж: « Теңгрин Бурхна орн-нутгт кен хамгин ик болжахмб?
2. Иисус бичкн көвү дуудж авад, теднэ дунд зогсачкад келв:
3. « Үнэр таднд келжэнэв: кемр тадн бийэн эс сольхла, бичкдүдлэ эдл эс болхла, тадн Теңгрин Бурхна орн-нутгт орж чадшгот.
4. Бийэн номһрулсн, бичкдүдлэ эдл болж чадсн күн, Теңгрин Бурхнла орн-нутгт хамгин ик болхмн.
5. Мини Нернэ төлэ тиим бичкниг бийдэн орулж авхла, тиим күн Намаг орулж авчана.
6. Нанд итксн тиим нег бичкниг жилвтүлэд, итклинь эвдсн күүнд эмд бээхин ормд теермин чолу күзүнднь бооһад, теңгсин гүүнд чивснь тер күүнд деер болх бээсмн.
7. Орчлңгд бээсн эмтиг жилвс зована. Юңгад гихлэ жилвс ирх зөвтэ. Болв жилв авч ирсн күн ик зовлңла харһх.
8. Кемр чини һар эс гиж көл чамаг жилвтүлэд, иткличн эвдхлэ, тээрэд бийэсн цааран хайчк. Хойр һартаһан, хойр көлтөһэн мөңк һалд тусхин ормд, өрөсн һар көлтөһэн мөңк жирһлд орсн деер.
9. Кемр чини нүдн чамаг жилвтүлэд, иткличин эвдхлэ, терүгэн бийэсн таслад авад хайчк. Хойр нүдтөһэн мөңк һалд тусхин ормд, өрөсн нүдтөһэн мөңк жирһлд орсн деер.
10. Медтн, саглтн, тер хамгин бичкдүдин негнд чигн бичэ дурго болтн. Би таднд келжэнэв: «Теднэ Бурхна элчнр Мини Теңгрин Эцкин чирэ оньдин үзнэ.»
11. Килнцдэн даргдад, үкчэх улсиг олхар болн аврхар Күмни Көвүн ирсмн.

12. Тадн юн гиж тоолжанат? Кемр нег күн зун хөөдтэ болад, теднэс негнь төөрэд геедрхлэ, тер йирн йисн хөөһөн уул заагт үлдэчкэд, геедрсн нег хөөһөн хөөһэд эс йовхий?

13. Үнэр Би таднд келжэнэв: «Кемр тер күн геедрсн нег хөөһөн олж авхла, йирн йисн хөөндэн тиигж байрлл уга, олж авсн нег хөөндэн үлүһэр байрлх.»

14. Тегэд тана Теңгрин Эцктн Эврәннь хамгин бичкнин негнь геешгоһар болн үкүлшгоһар седжэнэ.

15. Кемр ахчн чини өмнэс килнц һарһхла, эмтнд медүллго чирәһэрн үзлцэд буруһинь кел. Кемр чини үг тер соңсхла, чи ахан олж авхч.

16. Кемр эс соңсхла, негн эс гиж хойр кү дахулж одад кел. Тер улс чини келснд герч болх

17. Кемр чини ах тедниг эс соңсхла чонжд кел. Кемр чонжиг эс соңсхла, тер Бурхнд иткдго болн алв цуглулдг күүнлэ эдл болв гиж тоол.

18. Үнэр таднд келжэнэв: һазр деер тадн боосн юмн теңгр деер боогдх. Болн һазр деер тадн тээлсн юмн теңгр деер тээлгдх.

19. Үнэр Би таднд келжэнэв: кемр хойр күн һазр деер нег-негнлөһөн ниицэд Бурхнас ямаран чигн кергин тускар сурхла, Мини Теңгрин Эцк сурситн таднд өгх.

20. Юңгад гихлэ хойр эс гиж һурвн күн Мини Нернэ төлэ цуглрхла, Би теднэ дунднь бээнэв.

21. Тиигхлэ Пётр Иисус тал өөрдэд сурв: «Деед Эзн! Кемр ахм нанд гем кеһэд бээхлэ, кедү дэкж буруһинь тэвхм? Дола дэкчий?»

22. Иисус терүнд келв: «Долан дэкж» - гиж келжахшв. Доланас икэр, зуг долан дэкж долан холваһас үлүһэр.

23. Теңгрин Бурхна орн-нутг иим бээдлтэ: нег хан эврәннь мухласасн тооца

некхэр седв.

24. Хан тооцаһан некжэсн цагла терүнүр арвн миңһн арслң мөңг өртө мухлаг авч ирв.

25. Эн мухлад мөңгн уга болхла, эзн терүг гергтэһинь, күүкдтэһинь, гермалтаһинь хулдад, өрөн авхар шийдв.

26. Тиигхлэ мухла көлднь унад, мөргэд сурв: «Эзн! Невчкн зуур күлэтн. Би цугтаһинь өгхв.»

27. Тегэд эзн мухлаһан хээрлэд, өринь тэвэд йовулчкв.

28. Мухла энүнэс һарад, зун арслң өртө нээжлөрн харһад, өрөн некэд, бахлурнь базһад келв: «Өрим ас!»

29. Тиигхлэ нээжнь көлднь унад ээрэд сурв: «Күлэжэ, удл уга би чамд цугинь өгчкнэв.»

30. Болв мухла нээжэн хээрлл уга, өринь өгтлинь түүрмд суулһна.

31. Терүнэ нээжнрнь юн болснь үзэд дотран зовад, эврәннь эзндэн цугинь келцхэв.

32. Эзн мухлаһан дуудад терүнд келв: «Хар саната мухла! Чи намаг ээрэд сурхла, би чамаг хээрлэд өричн тэвчклэв.

33. Би чамаг хээрлүв. Чи юнгад бас тиигж нээжэн хээрлсн угач?»

34. Эзн уурлад, терүг цуг өрөн өгтл зовадг улсин һарт өгчкв.

35. Тиим кевэр Мини Теңгрин Эцкм нег-негнәннь болн ахиннь буруһинь эврәннь зүркнэс эс тэвхлэ, тана буруһитн Теңгрин Эцк бас тэвшго.»